



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

Nr. 784/Prot.
2

Tiranë, më 29/5 2017

REKOMANDIM

Nr. 15 datë 29/5 2017

Në mbështetje të neneve 29, 30 dhe 32 të Ligjit Nr.9887 datë 10/03/2008 "*Për Mbrojtjen e të Dhënave Personale*" i ndryshuar, neneve 77-112 të Ligjit Nr.44/2015 "*Kodi i Procedurave Administrative të Republikës së Shqipërisë*", si dhe provave të administruara në ngarkim të kontrolluesit Akademia e Sigurisë Tiranë,

VËREJ SE:

Në zbatim të Urdhrit Nr.139 datë 09.05.2017 të Komisionerit për të Drejtën e Informimit dhe Mbrojtjen e të Dhënave Personale, u krye hetim administrativ pranë kontrolluesit Akademia e Sigurisë Tiranë, me objekt kontrolli:

- Zbatimi i Ligjit Nr.9887 datë 10.03.2008 "*Për mbrojtjen e të dhënave personale*" i ndryshuar dhe akteve të miratuara nga Komisioneri, në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit të kontrolluesit Akademia e Sigurisë Tiranë.

Grupi i kontrollit, gjatë kryerjes së veprimeve procedurale, u asistua nga përfaqësuesit e kontrolluesit, të cilët ishin njohur me Urdhrin Nr.139, datë 05.05.2017 të Komisionerit. Kontrolluesi zhvillon programe të akredituara të studimeve për të tre ciklet e studimit në fushën e policisë, rendit dhe sigurisë publike.

Kontrolluesi Akademia e Sigurisë Tiranë, përpunon të dhëna personale kryesisht për subjektet e dhënave "*punëmarrës*" dhe "*studentë*". Përpunimi i të dhënave kryhet në mënyrë manuale (nëpërmjet dokumentacionit në formatin letër) si dhe në mënyrë elektronike nëpërmjet sistemeve të teknologjisë së informacionit të tilla si sistemi i video-vëzhgimit (CCTV), portali zyrtar i institucionit, pajisje kompjuterike etj.

Gjatë hetimit administrativ të ushtruar në vend, është konstatuar:

1. Kontrolluesi nuk ka realizuar detyrimin për "*Njoftim*", pranë Zyrës së Komisionerit në lidhje me përpunimin e të dhënave personale.
Konstatimi përbën shkelje administrative të neneve 21 dhe 22 të ligjit - "*1. Çdo kontrollues duhet të njoftojë Komisionerin për përpunimin e të dhënave personale, për të cilat është përgjegjës. Njoftimi duhet të bëhet para se kontrolluesi të përpunojë të dhënat për herë të*

parë ose kur kërkohet ndryshimi i gjendjes së njoftimit të përpunimit, sipas nenit 22 të këtij ligji, të njoftuar më parë”.

2. Kontrolluesi disponon rregulla të fragmentarizuara sipas strukturave me të cilat ai operon por nuk ka një rregullore të mirëfilltë për *“Përpunimin dhe mbrojtjen e të dhënave personale”*. Konstatimi përbën shkelje administrative të nenit 27 të ligjit – *“1. Kontrolluesi ose përpunuesi merr masa organizative dhe teknike të përshtatshme për të mbrojtur të dhënat personale nga shkatërrime të paligjshme, aksidentale, humbje aksidentale, për të mbrojtur aksesin ose përhapjen nga persona të paautorizuar, veçanërisht kur përpunimi i të dhënave bëhet në rrjet, si dhe nga çdo formë tjetër e paligjshme përpunimi. 2. Kontrolluesi merr këto masa të veçanta sigurie: 2/1. Kontrolluesi është i detyruar të dokumentojë masat tekniko-organizative të përshtatura dhe të zbatuara për garantimin e mbrojtjes së të dhënave personale, në përputhje me ligjin dhe rregulloret e tjera.”*
3. Kontrolluesi ka nënshkruar *“Deklaratë Konfidencialiteti”* me punëmarrësit të cilët kanë akses në mbledhjen, përpunimin dhe ruajtjen e të dhënave personale.
4. Kontrolluesi mbikëqyr ambientet e brendshme dhe të jashtme nëpërmjet sistemit të video-vëzhgimit (CCTV), të vendosura në hyrje të ambienteve ku ushtron aktivitet si dhe në korridore, por nuk disponon rregullore për funksionimin e këtij sistemi. Koha e ruajtjes së të dhënave imazhe-video është 13 ditë. Në ambientet e kontrolluesit janë vendosur tabela informuese mbi prezencën e sistemit të video-vëzhgimit (CCTV), janë vendosur në përputhje me formatin standard të miratuar në Udhëzimin Nr.46 të Komisionerit. Konstatimi përbën shkelje administrative të nenit 27 të ligjit – *“1. Kontrolluesi ose përpunuesi merr masa organizative dhe teknike të përshtatshme për të mbrojtur të dhënat personale nga shkatërrime të paligjshme, aksidentale, humbje aksidentale, për të mbrojtur aksesin ose përhapjen nga persona të paautorizuar, veçanërisht kur përpunimi i të dhënave bëhet në rrjet, si dhe nga çdo formë tjetër e paligjshme përpunimi.*

2. Kontrolluesi merr këto masa të veçanta sigurie:

2/1. Kontrolluesi është i detyruar të dokumentojë masat tekniko-organizative të përshtatura dhe të zbatuara për garantimin e mbrojtjes së të dhënave personale, në përputhje me ligjin dhe rregulloret e tjera.”

5. Kontrolluesi nuk ka publikuar në portalin zyrtar <https://www.asp.gov.al>, *“Politikat e Privatësisë”*. Informacioni i publikuar në *“Politikat e Privatësisë”*, ka për qëllim informimin e subjekteve të të dhënave që vizitojnë këtë portal, mbi mënyrat e përpunimit të të dhënave, masat e sigurisë, ruajtjes së konfidencialitetit, të drejtat e subjekteve të të dhënave dhe detyrimet e kontrolluesit në kuadër të mbrojtjes së privatësisë.

Konstatimi përbën shkelje administrative të nenit 18 të ligjit - *“1. Kontrolluesi, kur mbledh të dhëna personale, duhet të informojë subjektin e të dhënave për fushën dhe qëllimin, për të cilin do të përpunohen të dhënat personale, për personin që do t'i përpunojë të dhënat, për mënyrën e përpunimit...”*.

Në përfundim të procesit të hetimit administrativ, Zyra e Komisionerit, mban në konsideratë faktin që kontrolluesi ka qenë në bashkëpunim serioz me grupin e hetimit administrativ gjatë ushtrimit të kontrollit.

Sa më sipër:

Në zbatim të nenit 32/1 të Ligjit Nr. 9887 datë 10.03.2008 "Për Mbrojtjen e të Dhënave Personale" i ndryshuar,

REKOMANDOJ:

1. Në zbatim të nenit 21 dhe 22 të Ligjit Nr.9887, datë 10.03.2008 "Për Mbrojtjen e të Dhënave Personale" i ndryshuar, kontrolluesi Akademia e Sigurisë Tiranë, të realizojë plotësimin e Formularit të Njoftimit.
2. Në zbatim të nenit 27 të Ligjit Nr.9887, datë 10.03.2008 "Për Mbrojtjen e të Dhënave Personale" i ndryshuar, kontrolluesi Akademia e Sigurisë Tiranë, të formalizojë dhe përshtatë në funksion të aktivitetit të tij rregulloren për "Mbrojtjen, Përpunimin, Ruajtjen dhe Sigurinë e të Dhëve Personale".
3. Në zbatim të nenit 27 të Ligjit Nr.9887 datë 10.03.2008 "Për Mbrojtjen e të Dhënave Personale" i ndryshuar, dhe Udhëzimit Nr.46 datë 28.03.2017 të Komisionerit, kontrolluesi Akademia e Sigurisë Tiranë, të hartojë rregullore për funksionimin e sistemit të vëzhgimit (CCTV).
4. Në zbatim të nenit 18 të Ligjit Nr.9887, datë 10.03.2008 "Për Mbrojtjen e të Dhënave Personale" i ndryshuar, kontrolluesi Akademia e Sigurisë Tiranë, të hartojë dhe publikojë në portalin zyrtarë të tij, rubrikën "Politikat e Privatësisë".
5. Kontrolluesi Akademia e Sigurisë Tiranë, të realizojë plotësimet e detyrimeve të parashikuara në pikat 1, 2, 3 dhe 4 të këtij Rekomandim, brenda afatit 10 ditor nga momenti i marrjes dijeni.
6. Në rast mos përmbushje të këtyre detyrimeve, Komisioneri vepron sipas nenit 30/2 dhe 39 të Ligjit Nr.9887, datë 10.03.2008 "Për Mbrojtjen e të Dhënave Personale" i ndryshuar. Komisioneri në rast shkeljesh serioze, të përsëritura ose të qëllimshme të ligjit nga një kontrollues ose përpunues, veçanërisht në rastet e përsëritura të moszbatimit të rekomandimeve të tij, vendos sanksion me gjobë për kundërvajtjet administrative dhe e denoncon publikisht ose e raporton çështjen në Kuvend dhe në Këshillin e Ministrave.

Ky Rekomandim u shpall sot më datë 29/5/2017

BESNIK DERVISHI

KOMISIONERI